



# basic education

---

Department:  
Basic Education  
**REPUBLIC OF SOUTH AFRICA**

## **SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS**

**SISWATI LULWIMI LWASEKHAYA (HL)**

**LIPHEPHA LESIBILI (P2)**

**2019**

**EMAMAKI: 80**

**SIKHATSI: Ema-awa 2½**

**Leliphepha linemakhasi la-27.**

**TICONDZISO KULABAHLOLWAKO**

1. Fundzisisa leticondziso ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lalokucuketfwe bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.

3. Liphepha lemibuto licuketse TIGABA LETINTSATFU:

SIGABA A: Tinkondlo (30)

SIGABA B: Inoveli/Temdzabu (25)

SIGABA C: Umdlalo (25)

4. ISIHLANU IMIBUTO lefanele uyiphendvule seyiyonkhe: ESIGABENI A imibuto MITSATFU, ESIGABENI B MUNYE, ESIGABENI C MUNYE ngalendlela:

SIGABA A: TINKONDLO

TINKONDLO LETIFUNDVWE EKLASINI – Phendvula imibuto ibe MIBILI.  
ETINKONDLWENI LETINGAKAFUNDVWA EKLASINI – Uphocelelekile kuphendvula lombuto.

SIGABA B: INOVELI/TEMDZABU

Phendvula umbuto ube MUNYE.

SIGABA C: UMDLALO

Phendvula umbuto ube MUNYE.

5. KUKHETFWA KWETIMPHENDVULO TESIGABA B (INOVELI/TEMDZABU) NESIGABA C (UMDLALO)

- Phendvula KUPHELA imibuto yenoveli/temdzabu loyifundzile kanye nemdlalo lowufundzile.
- Phendvula UMBUTO MUNYE WENDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuphendvula umbuto wenzabambhalo ESIGABENI B, uphocelelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphocelelekile kutsi uphendvule umbuto wenzabambhalo ESIGABENI C. Sebentisa luhlu lwekutikhumbuta kute usitakale.

6. BUDZE BETIMPHENDVULO

- Imibuto yendzabambhalo etinkondlweni kufanele iphendvulwe ngemagama la-190–240.
- Indzabambhalo yenoveli/temdzabu nemdlalo kufanele iphendvulwe ngemagama la-340–390.
- Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisa kahle ticondziso letisekucaleni kwaleso NALESO SIGABA.

8. Tinombolo tetimphendvulo atihambisane naleto temibuto njengobe tinjalo ephepheni lemibuto.

9. Cala LESO NALESO SIGABA ekhasini LELISHA.

10. Siphakamiso sekulawulwa kwesikhatsi:

SIGABA A: Lokungenani emaminitsi la-40

SIGABA B: Lokungenani emaminitsi la-55

SIGABA C: Lokungenani emaminitsi la-55

11. Bhala ngesandla lesibonakalako nalesifundzekako.

**LOKUCUKETFEWE**

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

<b>SIGABA A: TINKONDLO – LALELA NGWANE</b>			
<b>Tinkondlo letimisiwe: Phendvula nobe nguYIPHI imibuto LEMIBILI.</b>			
<b>INOMBOLO YEMBUTO</b>	<b>UMBUTO</b>	<b>EMAMAKI</b>	<b>LIKHASI</b>
1. 'Ngawe Manti'	Umbuto loyindzatjanambhalo	10	6
2. 'Lomculo Ngiyawutsandza'	Imibuto lemifisha	10	7
3. 'Wena Gciwane Ndzini'	Imibuto lemifisha	10	8
4. 'Lutsandvo'	Imibuto lemifisha	10	9
<b>NA</b>			
<b>Inkondlo lengakafundvwa eklasini: Uphocelelekile kuphendvula lombuto.</b>			
5. 'Ngingabuye Ngitsini'	Imibuto lemifisha	10	10
* <b>CAPHELA:</b> Phendvula UMBUTO MUNYE WENDZABAMBHALO NAMUNYE UMBUTO EMIBUTWENI LEMIFISHA. Nangabe ukhetse kuphendvula umbuto wenzabambhalo ESIGABENI B, uphocelelekile kutsi uphendvule imibuto lemifisha ESIGABENI C.			
<b>SIGABA B: INOVELI/TEMDZABU</b>			
<b>Phendvula umbuto ube MUNYE kulamanoveli lamisiwe.</b>			
6. <i>Liphume Nebovu</i>	Umbuto loyindzabambhalo	25	12
7. <i>Liphume Nebovu</i>	Imibuto lemifisha	25	12
8. <i>Kubamba Letingelako</i>	Umbuto loyindzabambhalo	25	15
9. <i>Kubamba Letingelako</i>	Imibuto lemifisha	25	15
10. <i>Tibopho Telutsandvo</i>	Umbuto loyindzabambhalo	25	17
11. <i>Tibopho Telutsandvo</i>	Imibuto lemifisha	25	17
<b>NOBE</b>			
<b>TEMDZABU: Phendvula umbuto ube MUNYE kulena yetemdzabu lamisiwe.</b>			
12. <i>Silulu SeMaswati</i>	Umbuto loyindzabambhalo	25	19
13. <i>Silulu SeMaswati</i>	Imibuto lemifisha	25	19
<b>SIGABA C: UMDLALO</b>			
<b>Phendvula umbuto ube MUNYE.</b>			
14. <i>Kutawuba Njalo</i>	Umbuto loyindzabambhalo	25	22
15. <i>Kutawuba Njalo</i>	Imibuto lemifisha	25	22
16. <i>Lami Lisiphetfo</i>	Umbuto loyindzabambhalo	25	25
17. <i>Lami Lisiphetfo</i>	Imibuto lemifisha	25	25

\***CAPHELA:** ESIGABENI B na-C, munye umbuto lophendvuliwe ufanele ube YINDZABAMBHALO nobe IMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.

**LUHLA LWEKUTIKHUMBUTA**

Lelikhasi litawusita bahlolwa kutsi babone kutsi ngabe baphendvula linani lemibuto lekungulona lekumele baliphendvule.

<b>SIGABA</b>	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>BEKA LUPHAWU✓</b>
A: TINKONDLO (Tinkondlo letifundvwe eklasini)	1–4	2	
A: TINKONDLO (Inkondlo lengakafundvwa eklasini)	5	1	
B: INOVELI/TEMDZABU (Indzabambhalo nobe imibuto lemifisha)	6–13	1	
C: UMDLALO (Indzabambhalo nobe imibuto lemifisha)	14–17	1	
<b>CAPHELA:</b> ESIGABENI B ne-C, cinisekisa kutsi uphendvule YINYE INDZABAMBHALO NAMUNYE umbuto WEMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.			

**SIGABA A: TINKONDLO****TINKONDLO LETIFUNDVWE EKLASINI**

Khetsa tinkondlo tibe TIMBILI bese uphendvula ngato imibuto lelandzelako.

**UMBUTO 1: UMBUTO LOYINDZATJANAMBHALO**

Fundza lenkondlo bese uphendvula imibuto lelandzelako.

**NGAWE MANTI – JJ Thwala**

- 1 Uwuncobil' umhlaba jikelele
- 2 Ngetikhali takho letinemandla,
- 3 Wakhobosa wakhotsama kuwe
- 4 Manti latsakiwe, mant' etimanga.
- 5 Ngawe tinkanankana tiyaphindzaphindzana
- 6 Ub' ugcamisa kuts' ungumcatululi;
- 7 Unikana sibindzi nenhlakanipho
- 8 Manti latsakiwe, mant' etiga.
- 9 Labakwatiko bacevuta batsi:
- 10 Usilulu sebuchomoketi nelusizi,
- 11 Uyindumba yemhobholo nelunya,
- 12 Uyintsanga yenkhohlakalo nelulaka.
- 13 Mant' etiga! Mant' emihlolo!
- 14 Wagobhota kangaka yini?
- 15 Uchamuka kusiphi siyalu
- 16 Lesi lesinemandla lesingashi?
- 17 Labakutsandzako bakukhontisa kwenkhosi,
- 18 Kuwe bakhotsama ngemadvolo,
- 19 Kuwe batfula tigcoko,
- 20 Kuwe bashaya tandla.
- 21 Kugubhatela kwakho manti,
- 22 Kufana nekwemagagas' elwandle,
- 23 Kufana nekwelibhudlo sibili,
- 24 Kulets' umsindvo locedvwa ngubutfongo.
- 25 Wo, Mvelinchanti kulelisenhla,
- 26 Hlisa somiso salamanti
- 27 Kushe tiyalu, kushe ticoja,
- 28 Kush' emabhudlo, kushe titiba.

Bhala indzatjanambhalo lapho ucoca khona ngesakhiwo sangekhatsi lesivetwe yindzima 1, 2, 4, ne 7 kulenkondlo.

Budze bemphendvulo yakho abube ngemagama langabi ngaphasi kwala-190 kodvwa angabi ngetulu kwala-240.

**[10]**

**UMBUTO 2: IMIBUTO LEMIFISHA**

Fundza lenkondlo bese uphendvula imibuto lelandzelako.

**LOMCULO NGIYAWUTSANDZA – ME Masina**

- 1 Lomculo ngiyawutsandza,
- 2 Ungikhumbuta tinsuku tayitolo nakutsanti,
- 3 Laph' emasi nemabele kwakukudla kwemihla,
- 4 Emadvodz' adl' inyam' ayehlise ngemhluti
- 5 Abuy' anats' umcombotsi.
  
- 6 Ngitsandza kuhlelenjiswa kwetinsimbi kuwo,
- 7 Ngitsandza kuhlanguana kwemisindvo kuwo,
- 8 Lokungitsatsa kungikhuphule
- 9 Kungewet' imifula nemawa
- 10 Kungicancis' imicansa,
- 11 Netintsaba letimakheleketse,
- 12 Ngite ngifike lapho ngingati khona.
  
- 13 Lomcul' utfob' emanceb' ubusis' inhliyo,
- 14 Utfob' umphefumulo lowephukile,
- 15 Ungikhumbut' emachawe lamadzala,
- 16 Emachawe lesaba matsambomhlophe,
- 17 BoZakes Nkosi naboSpokes Mashiyane,
- 18 Yeb' emachawe langek' afe kuma-Afrika.
  
- 19 Lomcul' ungikhumbut' umculo wetinyoni
- 20 Letihlabel' etikwenkhokhokho,
- 21 Mhla ngilindza emabel' emasimin' ababe,
- 22 Yebo, tatihlabela kamnandzi.
- 23 Lomculo lengiwuvako
- 24 Yebo, lomculo lengiwulalele,
- 25 Uyangibusisa futs' uyangitfoba
- 26 Impela lomculo ngiyawutsandza.

- 2.1 Hlobo luni lweluchumano loluvelwa ngumugca we-13 newe-14 kulenkondlo lengenhla? (1)
- 2.2 Bunkondlo buni lobucuketfwe ngumugca we-23 kulenkondlo lengenhla? (1)
- 2.3 Bhala phasi umugca lonesilinganisamcondvo endzimeni yekucala. (1)
- 2.4 Ngulokunjani lokumatsambomhlophe? (1)
- 2.5 Yini lokucanca tintsaba letimakheleketse lakhuluma ngako sonkondlo? Chaza. (2)
- 2.6 Uvumelana kangakanani naloku lokushiwo ngumugca we-18 kulenkondlo lengenhla? Sekela imphendvulo yakho ubhekise kulokusenkondlweni. (2)
- 2.7 Mlayeto muni sonkondlo lawendlulisela etetsamelinilwati takhe ngalenkondlo lengenhla. Usho ngani? (2)

**[10]**

**UMBUTO 3: IMIBUTO LEMIFISHA**

Fundza lenkondlo bese uphendvula imibuto lelandzelako.

**WENA GCIWANENDZINI! – TE Sithole**

- 1 Azange ngikusukele
- 2 Nguwe lowangisukela,
- 3 Wahlala nami ngaphandle kwekuvumelana
- 4 Awuzang' ufune kuva umbono wami.
- 5 Utitselile-ke msobho elutswayini
- 6 Ngitakukhomba bantfu kutsi banjani!
- 7 Emahlon' awunawo mbulalavendzini!
- 8 Awunandzaba nesitfunti semuntfu
- 9 Utitsel' inyandza ugadle,
- 10 Usilise njengembokodv' etjeni,
- 11 Usila kulomdzala, usile kulomncane
- 12 Hhawu lobudlabha bakho!
- 13 Lamuhla ufik' ekugcineni.
- 14 Ngilibonile litubane lakho
- 15 Uta ngemandl' ufike ugadle,
- 16 Ufike ubhubhise nasewufikile,
- 17 Ngatsatsa tami ngahloma ngaphelela,
- 18 Ngaya kubeluleki bangihlomisa ngelwati
- 19 Ngalalelisisa njengemntfwana nakatfunywa.
- 20 Siyohlangan' etulu njengelihlindzafuku.
- 21 Angeke ngikucoshe gciwanendzini
- 22 Sitawuhlala nje sinawe
- 23 Kodvwa utawulalela mine,
- 24 Ngiyat' imizuzu nemahora kuyatfubeleta,
- 25 Kujake kungisibekela ngentima,
- 26 Nakimi kuyophel' emafuts' esibaneni.
- 27 Kodvwa angek' ungitfole malula
- 28 Labanyenti ngiyobacwayisa ngawe,
- 29 Ngobe wen' ulicili lelihamba ngebumnyama.

- 3.1 Finyeta lokusobala lokushiwo ngulenkondlo ngeliphuzu LINYE. (1)
- 3.2 Bhala phasi imigca lenemvumelwanosigcino endzimeni yekucala. (1)
- 3.3 Lusetjentiselweni loluphawu loludvwetjelwe emgceni we-11 kulenkondlo lengenhla? (1)
- 3.4 Phawula ngekuhleleka kwesakhiwo salenkondlo ubhekise emigceni yalenkondlo. (1)
- 3.5 Utsini umbono wakho ngaletindlela hulumende latisebentisako kwetama kusita ummango kuvikela nekwelapha leligciwane lelishiwo ngusonkondlo? Bhala ngemaphuzu LAMABILI. (2)
- 3.6 Phawula ngekufaneleka kwesifaniso lesisetjentiswe emgceni we-10 walenkondlo lengenhla. (2)
- 3.7 Uyavumelana yini naloku lokushiwo ngusonkondlo emgceni we-29 ngaleligciwane? Sekela imphendvulo yakho. (2)

**[10]**



**UMBUTO 4 (IMIBUTO LEMIFISHA)**

Fundza lenkondlo bese uphendvula imibuto lelandzelako.

**LUTSANDVO – SC Msibi**

- 1 Bakubita ngemagama lamanyenti
- 2 Bakuhumushe ngetindlela letinyenti,
- 3 Ngobe bakubon' umuhle lamuhla.
- 4 Kutsi ngakusasa bakucalekise kwangayitolo
- 5 Labakuphimise ngemilomo yabo.
- 6 Ngobe wena sewutichaze wacedza
- 7 Wafana nencwadzi lefundzekako.
  
- 8 Itolo bebakunconotisa wena lutsandvo
- 9 Bats' uhlobile futs' umsulwa,
- 10 Ngob' **ungakavangwa nalutfo loluyimali.**
- 11 Babuye bats' uneluvulo ngob' awuhlukumeti
- 12 Bangayilibal' inhlonipho lonayo.
- 13 Konkhe bakubone kuhamba kahle
- 14 Ngob' ubabophe ngemaketang' akho,
- 15 Labopha tihonga netihlakaniphi,
- 16 Bagcine bakutfobela wena.
  
- 17 Umhlab' uhlangene bewuyini?
- 18 Ngaphandle kwakho lutsandvo,
- 19 Ngob' ungumbophi wetinhlitiyo
- 20 Letikhatsatekile naletinesitunge.
- 21 Nasewufikile wena lutsandvo
- 22 Umbukisisa njengabhekilanga wakho
- 23 Nakabon' imisebe yelilanga.
- 24 Ngob' ukhanya njengelilanga emini,
- 25 Ukhanya njengenyet' ebusuku
- 26 Ngobe sekufike wena lutsandvo.
  
- 27 Umuhle lutsandvo
- 28 Labanye bats' ubaba njengemhlonyane,
- 29 **Ngob' ufika tigi takho tingevakali,**
- 30 **Ubuy' uhamb' ungavalelisanga,**
- 31 Ngobe vel' ufana nesihambi.
- 32 Hamb' uyoitsela lutsandvo
- 33 Nemilingo yakho lenhlobonhlobo.

- 4.1 Bhala MUNYE umlingo locabanga kutsi wentiwa lutsandvo. (1)
- 4.2 Nika sibonelo SINYE seligama kulawo lashiwo ngumugca we-1 walenkondlo. (1)
- 4.3 Yini kutsiwe lenkondlo iyinkondlogceka/iyisathaya? (1)
- 4.4 Utichaza aticedze ngayiphi indlela lona lokukhulunywa ngaye kulenkondlo njengobe kushiwo endzimeni yekucala? (1)

- 4.5 Humusha imigca lecindzetelwe endzimeni ye-4 ubhekise emphilweni lephilwa lomuhla. Bhala emaphuzu lamabili. (2)
- 4.6 Uvumelana kangakanani naloku lokushiwo ngumugca we-10 kulenkondlo lengenhla? Sekela imphendvulo yakho. (2)
- 4.7 Ungatsini ngelutsandvo nawunganikwa litfuba lekutsi uluchaze ngemaphuzu LAMABILI? (2)
- [10]

### NA

#### INKONDLO LENGAKAFUNDVWA EKLASINI

Wonkhe umhlolwa uphococelekile kutsi awuphendvule lombuto.

#### UMBUTO 5: IMIBUTO LEMIFISHA

Fundza lenkondlo bese uphendvula imibuto lelandzelako.

#### NGINGABUYE NGITSINI? – SW Mnisi

- 1 Bengitsi nginelitsemba mntfwanaketfu,
- 2 Bengitsi nginelutfo mntfwanaketfu,
- 3 Lutfo lolo luphunyukile lwanyamalala,
- 4 Lunyamalele njengemant' esihlabatsini,
- 5 Pho, ngingabuye ngitsini?
- 6 Bengiphetseni kona kungasimanti?
- 7 Bengingati kutsi ngiphetse lite;
- 8 Lite lona lelijinge laba ngumoya,
- 9 Laba ngumafel' emlonyeni sibili,
- 10 Pho, ngingabuye ngitsini?
- 11 Basho nalabadzal' emandvulo-
- 12 Batsi kuncono kwetsemba litje kunemuntfu,
- 13 Kepha akusuwe longiphocile,
- 14 NguSomhawu Monase wakaKufa.
- 15 Luvutse lwavutsa njengemalangabi
- 16 Lwagcina ngemangaba sibili,
- 17 Pho, ngingabuye ngitsini?
- 18 Bengitsi kuncane kantsi kukhulu,
- 19 Bengitsi **ngushukela** kantsi **yinshubaba**;
- 20 Kube kantsi kona bekutawushubelani?
- 21 Kube kukwani kona sibili?
- 22 Pho ngingabuye ngitsini?
- 23 Bengetamile kukukhomba lingekhatsi lami,
- 24 Bese ngisidzabulile sifuba sami,
- 25 Bese ububonile bukhulu balo,
- 26 Kepha lwagcina ngekuba ngumoya;
- 27 Bengitsi siyohlukaniswa ngukufa,
- 28 Kufa usehlukanisile singakashadi,
- 29 Pho, ngingabuye ngitsini?

[Atsekeletene!: 70–71]

- 5.1 Bunkondlo buni lobuvelwa ngulamagama lacindzetelwe emgceeni we-19 kulenkondlo lengenhla? (1)
- 5.2 Ngulenjani intfo lengumafel' emlonyeni? (1)
- 5.3 Usho kutsini sonkondlo ngemugca we-24? (1)
- 5.4 Yini leyente sonkondlo asebentise imphindvwa etindzimeni talenkondlo? (1)
- 5.5 Ucabanga kutsi sonkondlo bekakusiphi simo nabhala lenkondlo? Usho ngani? (2)
- 5.6 Nguliphi litiko lahulumende lelingasita sonkondlo kulesimo lakuso? Shano KUNYE lelingasita ngako. (2)
- 5.7 Sifaniso lesisetjentiswe ngusonkondlo emgceeni we-4, sikufanele kangakanani loko lakufanisa nako? Chaza. (2)

**[10]****SAMBA SESIGABA A:****30**

**SIGABA B: INOVELI/TEMDZABU**

Kulesigaba kunemanoveli LAMATSATFU netemdzabu. Wena-ke khetsa ibe YINYE loyifundze eklasini lonyaka, uphendvule ngayo.

**CAPHELA:** Khetsa emkhatsini WENDZABAMBHALO NEMIBUTO LEMIFISHA kuleyo noveli/temdzabu loyifundzile. Nangabe ukhetsa kuphendvula umbuto wendzabambhalo kulesigaba, uphococelekile kutsi ESIGABENI C uphendvule imibuto lemifisha.

**INOVELI**

Phendvula umbuto ube MUNYE kulamanoveli langentasi.

**UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Bhala indzabambhalo lapho ucoca khona ngetigameko letiveta ingcikitsi yalenoveli ebaleni.

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 7: IMIBUTO LEMIFISHA****LIPHUME NEBOVU – BB Malangwane**

Fundza lethekesthi leyincenye yendzaba lesenovelini bese uphendvula imibuto lelandzelako.

**THEKSTHI A**

Ngalenywe intsambama, batsi balindzele kubuya kwetinkhomo, babona kuchamuka umfanyana lomncane labelusa timbuti. Ngalelo langa abengachubi mbuti, angachubi nkhomo, kepha ahamba nje jambajamba angakaphatsi nemzaca wodvwa lo. Utsite aseta nje lapha ekudzeni LaMagagula wabe asammemetile ngalesikhulu sankhahlo. Phela kwakulibhunu sibi salo.

5

'Tiphi tinkhomo wena? Tona letimbuti lamuhla utishiyephi selishonile nje?'

'Batsi angitekusho kutsi Zembe akabonakali.' Atsi angakaligwinyi amjube unina.

'Utsi Zembe ushonesthi? Ngiphangisele wena bo.'

'Ungene enkelebheni abambe umsila wenkhomo, wangabe asaphuma.'

'Hawu! Mine ngemntfwanami longaka nebakitsi. Kodvwa ngoneni Nkulunkulu ngize ngishaywe kangaka,' kusho LaMagagula asahamba aya ngakaTintfombi ayekumtjela ngaleninga lefika nalomntfwana.

10

Kwesuka lesikhulu sidvumo lapha ekhaya. Bakhapha bantfwana kwatsi citsi saka sebayewubikela bomakhelwane. Umkhosi nasewuhlatjiwe-ke bonkhe bantfu basukumela etulu.

15

Kwaba njalo namhla umntfwana waLaMagagula labesaneminyaka lesiphohlongo kuvakala kutsi ungene ekhatsi enkelebheni abambe umsila wenkhomo wangaphindza waphuma. LaMagagula naye wahamba nabo labo labaya kuyawufuna. Pho kwakuhambeka yini loku abewa nje. Bantfu bayaluka kwaze kwaba kusihlwa impela, kodvwa abazange bamtfole lowo mntfwana. Umuntfu nasafile uyantanta emantini, kodvwa bebabatse batambona phindze. Basuke bacakwa nje kutsi ngabe udliwe silwane sini. Babuyela emakhaya bamangele, noko batsemba kutsi batawuvukela khona ekuseni kumbe bambone. 20

Kusa kwatiwa ngabo bantfu bemmango. Kwatsi kuphuma lilanga kwabe sekumnyama siganga. Bonkhe bebefuna lowo mfanyana. Bebaphetse letindze naletimfisha tintfungo beva ngato lapha ekhatsi emantini. Labanye labebatinhlambi, bebangena bacwile bayovumbuka kuletinye tindzawo. Kodvwa nalabo, bebavumbuka lite. 25

Kwatsi ngensimbi yemfica kwefika lenye indvodza leyatsi ifika nayo yakhumula yatiphosa ekhatsi njengalamanye. Itsite ingena nje yatsi cwili sikhshana, kuvumbuka kwayo yabe seyivumbuka nemfana leyamkhandza acosheme khona lapho bebasolo bafuna khona. Abeloku avunule lawo majotjana akhe ngetulu agcoke lijezana lelinsundvu labelitsengelwe ngunina kubantfu betinshiphi. 30

Sililo lesesuka lapho sasidzabukisa ngisho emadvodza imbala. Lapho kufikwa ekhaya nesidvumbu sacalela phasi sililo sekukhala ngisho nebantfwana labesebabona kutsi kwentekani. 35

'Kwenteke kahle phela kufelwe lolongafelwa,' Kusho lomunye wemakhosikati labekuleso sicuku lesasifika sivela enkelebheni.

'Utsini LaSukati, yini leloyikhulumako?' Sekusho umkhoti wakhe amdvonsa ngetidvwaba. Bantfu labebasedvute bayiva lenkhulumo bamutsi klabe, babheka phasi ngenca yemahloni. 40

[Likhasi 84–85]

- 7.1 Nawufundzisisa lethekesthi ngabe lenkhomo leyabangela kufa kwaZembe yashonaphi? Nika KUBILI. (2)
- 7.2 Umuntfu natawuvelelwa ngulokubi uyaye abikelwe emtimbeni. LaMagagula wakukhombisa ngayiphi indlela kutsi abebikelwa ngekufa kwemntfwanakhe? Nika KUBILI. (2)
- 7.3 Yini lekhombisa simonhlalo sesikhatsi lapho kwenteka khona lesigameko lesisetheksthini? (2)
- 7.4 Ngubuphi bantfu lobakhonjiswa nguLaMagagula natfola umbiko wekushonelwa ngumntfwana wakhe? Bhala KUBILI. (2)
- 7.5 Ngekwakho kubona letintfunga lebetiphetfwe ngulabantfu bemmango betiphephe kanganani kulomsebenti labebayowenta enkelebheni? Chaza. (2)
- 7.6 BoLaMagagula bebahlalisene ngekuvana nemmango labebahlala kuwo. Vumela nobe uphikise lesitatimende bese wesekela imphendvulo yakho. (2)

- 7.7 Nguliphi Litiko lekufanele lilungise lesimonhlalo kulommango waboLaMagagula? Belingasilungisa ngayiphi indlela? (2)
- 7.8 Bhala umusho losetheksthini loveta inkholo yaLaMagagula. Shano luhlobo lwenkholo yakhe. (2)
- 7.9 Beliyini litsemba lalabantfu nabayofuna lomfanyana nawufundzisisa letheksthi? Usho ngani? (2)
- 7.10 Kulesakhiwana lesisetheksthini, nguyiphi incenye yaso lemele luvutfondzaba? Chaza. (2)
- 7.11 Ngabe inhlitiyo yaTintfombi beyidzabuke ngempela yini nobe abehlisa tinyembeti tengwenya? Sekela imphendvulo yakho. (2)
- 7.12 Phawula ngemaphuzu LAMATSATFU laveta similo saTintfombi ebaleni. (3)

**[25]**

**UMBUTO 8: UMBUTO LOYINDZABAMBHALO****KUBAMBA LETINGELAKO – DE Nkosi**

Bhala indzabambhalo lapho ucoca khona ngetigameko letiveta ingcikitsi yalenoveli ebaleni.

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 9: IMIBUTO LEMIFISHA****KUBAMBA LETINGELAKO – DE Nkosi**

Fundza lethekesthi bese uphendvula imibuto lelandzelako.

**ITHEKSTHI B**

'Nivumelani kutsi siphathwe ngumchamuki, kutsiwe yimeya lenkhulu yetfu?' kubuta Magumeni kuShongwe akhombisa kunganeliswa kuphatfwa nguMphikeleli.

'Ukhetfwe bantfu, ngako-ke asinalo lilungelo lekuphikisana nevoti. Uma siphikisana naye kusho kutsi siphikisana nebantfu. Ungumsinsi wekutimilela kulenzawo, ngako-ke kuliphutsa lelikhulu kumbita ngemchamuki,' kusho Shongwe aphenhvula 5  
Magumeni.

'Kube liphutsa lelikhulu kukhetsa yena ngobe amange ahlale kulenzawo, sikhatsi sakhe lesinyenti. Tsine sicale kumbona lapho afundza libanga lelishumi nambili nemfundvo yakhe yasenyuvesi,' kusho Magumeni.

'Nanobe kunjalo, ungumntfwana wenzawo lekumele anikwe inhlonipho lemfanele futsi 10  
ahole ummango ngaphandle kwekuphikiswa,' kusho Shongwe.

'Nitsini ngetinchubomgomo takhe letiphatselene nekwakhiwa kwetindlu, emanti, gezi, ematfuba emisebenti, temasiko nekukhibika, temvelo, tebulungiswa, temnotfo naletinye?' kubuta Magumeni.

'Tinchubomgomo akusito temuntfu, kepha tahulumende. Yena sisebenti sebantfu 15  
labasikhetsile kutsi sibahole futsi sibasebentele ngendlela lefanele,' kuphendvula Shongwe.

Watibonela Magumeni kutsi uhlangene netimbila tifutsa tiholwa ngulemhlophe embili. Amange aphelelwe ngemandla, wachubeka nekuveta imibono yakhe leyenta kutsi angahambisani nenchubo yaMphikeleli. 20

'Utsini ngesento saMangweni sekuhlanganisa belaphi bendzabuko labalandzelako: tangoma, tinyanga, bapholofidi, bafembi, balozi nalabanye kutsi babe nemihlangano yabo letsintsa tekwelapha? Utsini ngaloko Mntimandze njengemfundisi welibandla?'

'Kutsi angisuye umhambi waleyo ndlela, akusho kutsi ngibokhobosa lwati lwenzabuko. Bokhokho betfu bakhule ngalo lolo lwati, ngako-ke kutawube kuliphutsa 25  
kitsi kwehlukana nalo. Umholi sibili wemukela konkhe lokwentwa ngummango lokuhlelekile futsi lokuveta imisimeto. Sento saMangweni ngisishayela lihlombe,' kusho Shongwe.

'Ungumfundisi lonjani loshayela tento takasathane lihlombe?'

'Kwehlulela bantfu loko. Likhohwa sibili alikwenti loko lokwentako. Kumele siwahloniphe emalungelo nenchubo yalabanye bantfu, njengobe sifuna kutsi ihlonishwe inchubo nemalungelo etfu.'	30
'Ngilindzele kutsi ukukhobose konkhe loku lokwentiwa nguMangweni ngobe kulihlazo kitsi.'	
'Akusilo lihlazo, kepha kusho kucacelwa kabusha ngemphilo yetfu. Umholi locotfo wenta lokufunwa ngummango, angatenteli yena lokufunwa nguye. Kumele simesekele Mangweni ekuholeni lesive ngebucotfo, ngekwetsembeka nangemaciniso. Loku lewufuna kukuzuzela lapha kimi, angeke ukutfole ngobe kuphambene nemgomo wemphilo yami. Asikhulume lokunye, siyekele loku ngobe akwaxhi kepha kuyabhidlita.'	35
Washo Shongwe wavalelisa wahamba. Wasala Magumeni abambe inhloko, ngobe abona kutsi uye wathaya etjeni.	40
Waphuma Magumeni ekhaya lakhe, wacondza kaNyoni, lapho wefika wakhulekela watsi, 'Lusiba!' Wavulelwa wangena, wamukelwa ngetandla letimhlophe.	
	[Likhasi 42–43]

- 9.1 Hlobo luni lweludweshu loluvetwe kuletheksthi lengenhla? Sekela imphendvulo yakho. (2)
- 9.2 Nawufundzisisa letheksthi lengenhla ngabe Magumeni uvetwe njengemlingisi loyindilinga nobe losicaba yini? Sekela imphendvulo yakho. (2)
- 9.3 Tinkhulumo taMagumeni kuletheksthi lengenhla ngabe timveta angumuntfu lonasiphi similo? Nika KUBILI. (2)
- 9.4 Bhala KUBILI lebekuhloswe nguMphikeleli ngekuhlanganisa belaphi bendzabuko ndzawonye. (2)
- 9.5 Tifukutfuku taMphikeleli atimange tiphelele eboyeni. Sekela lombono ngalokusencwadzini. (2)
- 9.6 Mphikeleli uhambisana ngayiphi indlela nemtsetfosisekelo waseNingizimu Afrika ngekwetfula tinsita temanti nagezi? Nika KUBILI. (2)
- 9.7 Kushiwo ngani kutsi Magumeni abehlangene netimbila tifutsa kuShongwe? Chaza. (2)
- 9.8 Kuhle ngani kutsi uphatse bantfu ube ungumsinsi wekutimilela endzaweni? Bhala KUBILI. (2)
- 9.9 Timphendvulo taShongwe betimfundzisanani Magumeni? Nika KUBILI. (2)
- 9.10 Kuletheksthi kukhulunywa ngekubaluleka kwemmango. Ngekwakho kubona ubaluleke ngayiphi indlela ummango nawufundza letheksthi lengenhla? Nika KUBILI. (2)
- 9.11 Tetsamelilwati tecwayiswani ngaletento taMagumeni kuletheksthi lengenhla? Nika KUBILI. (2)
- 9.12 Uvumelana kangakanani nemavi aShongwe latsi, 'Inchubomgomo akusiyo yemuntfu munye, kepha yahulumende nemmango.' Sekela imphendvulo yakho ubhekise kulokwenteka emimangweni lokuphilwa kuyo lomuhla. (3)

**[25]**



**UMBUTO 10: UMBUTO LOYINDZABAMBHALO****TIBOPHO TELUTSANDVO – JJ Thwala**

Bhala indzabambhalo lapho ucoca khona ngetigameko letiveta ingcikitsi yalenoveli ebaleni.

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 11: IMIBUTO LEMIFISHA****TIBOPHO TELUTSANDVO – JJ Thwala**

Fundza lethekesthi bese uphendvula imibuto lelandzelako.

**ITHEKSTHI C**

'Uma lomfelokati afuna kutewugana lapha, mtjele ehluwane nayo yonkhe lemikhuba layigilako. Uma eta naletinfo takhe lapha, uyosontseka intsamo afe luhlangotsi. Akadlali emadloti alapha ekhaya.'

Etfuke kakhulu Mlungisi nakeva unina akhuluma ngalendlela. Atsi usatsi ufuna kuphendvula achubeke unina. 'Uma lidloti lingacasuka mfana wami, ngeke nishade 5 ngisho kushada kodvwa loku.'

Abone Mlungisi kutsi kufuna acunge sibindzi abukane ngco naLomusa. Avalelise kunina. Esuke lapho acondze endlini ayophumula. Imicabango ihlale kuye. Atitjele kutsi nobe kumatima kepha ayikho intfo letamvimbela kutsi ashade naLomusa.

Angakhoni nekwenta emalungiselelo esikolo ngalolanga Mlungisi. Wabe usatsi 10 ubhala loku ente liphutsa. Atsi ulungisa ngalapha konakale ngalapha. Kubuye kufike umcondvo lotsi aketame lisu lekuyekelisa Lomusa tjwala. Acakwe kutsi lisu akanalo. Kulokunye ate ative sekacasukile. Atitjele kutsi kuncono afike acabane naLomusa kube kanye. Uma bacabanela kutsi kulunge simo sabo kuncono.

Lokulula kunako konkhe kucosha Nkhangala, Lomusa angaba ngumuntfu. 15 Kungenteka naletinfo letishiwo ngaye tingaphela, butfongo bumbambe kulobo bumnyama. Avuke ngakusasa acondze esikolweni. Afune Madvodza kumbuta ngaletinfo lebetishiwo ngunina ngaLomusa. Bamtjele kutsi utsite Madvodza utawufika emini. Alindze Mlungisi ate efike Madvodza.

'Ndvodza, kunjani?' 20

'Cha, kulungile Madvodza.'

'Tinfo atihambi kahle. Uvile kutsi Lomusa usesibhedlela?'

'Batsi bekaphetfwe yini Madvodza?'

'Kuncono uyotivela khona esibhedlela mnaketfu. Nami anginalwati.'

'Uhanjiswe ngubani esibhedlela?'

25

'Phela bekakhona lomngani wakhe lokutsiwa nguNkhangala.'

Athule Mlungisi. Asole ngatsi lokugula loku kunaNkhangala ekhatsi. Yini ashiye Lomusa aphilile ekuseni kufike Nkhangala agule? Abone kutsi lobungani babo buyingoti kulomshado letama kuwulungisa naLomusa.

Kutsi nakuphuma sikolo aphume aphantise Mlungisi aphikelele esibhedlela. Kutsite kuvulwa egedeni ngesikhatsi sekungena abesamile. Ahambe asheshise. Edlule ephoyiseni abute liwadi lalabasikati. Bamkhombe, acondze khona. Kugcwele ewadini lapho. Abute kulomunye umhlengikati. 30

'Ngicela kubona Lomusa mhlengikati.'

'Ufike nini?'

'Itolo.'

'Uphetfwe yini?'

'Angati mhlengikati. Akaketi nami lapha esibhedlela.'

Umhlengikati watsi ababuke emabhukwini. Asheshe alitfole ligama laLomusa. Abuke Mlungisi umhlengikati. Asuke lapho abite lomunye umhlengikati. Batsi kukhuluma angeva Mlungisi kutsi batsini. 40

'Ndvodzana, sitakukhombisa yena, kodwa uma ufuna kukhuluma naye ubuye kusasa.'

'Ngiyeva mhlengikati.'

Ahambe Mlungisi alandzele umhlengikati loyo. Nembala nguye Lomusa. Usakatekile embhedeni uchunywe emaphayiphi. Abuke Mlungisi esuke anikine inhloko, ahambe. 45

[Likhasi101–103]

- 11.1 Ngutiphi letento lokufanele Lomusa ehlukane nato ngembikwekutewendza kuMlungisi? Nika KUBILI. (2)
- 11.2 Shano KUBILI lebekucabanisa Mlungisi nenina. (2)
- 11.3 Umbhali walenovelini umvete anesimilo lesinjani lomhlengikati lowakhombisa Mlungisi lapho bekulele khona Lomusa? Sekela imphendvulo yakho. (2)
- 11.4 Bhala tintfo LETIMBILI letikhomba simonhlalo sesikhatsi kuletheksthi. (2)
- 11.5 Bangani bayasitana kulesinye sikhatsi. Bhala emahlandla LAMABILI lapho Nkhangala wakhombisa loko kuLomusa. (2)
- 11.6 Ucabanga kutsi yini leyenta Lomusa abaleke ekhaya kubo? Nika KUBILI. (2)
- 11.7 Phawula ngalamagama lakhulunywa nguMlungisi awacondzise kunina latsi, 'Usho kutsini nawusho njalo, kantsi nawe sewungumhlengikati?' (2)
- 11.8 Mlungisi abecabangani ngeligalelo laNkhangala kulokwenthiwa nguLomusa? Chaza sigameko sinye lesisenovelini. (2)
- 11.9 Nika umbono wakho ngalokutsi Mlungisi eve ngaMadvodza kutsi Lomusa usesibhedlela. (2)
- 11.10 Ngabe lamavi latsi, 'Lidloli lingacasuka, ngeke nishade,' aba yimphumelelo ngayiphi indlela? Chaza. (2)
- 11.11 Lijingi lidliwa yinhlitiyo. Chaza lesaga ubhekise kuMlungisi. (2)
- 11.12 Phawula ngetintfo LETINTSATFU lebetihlupha Mlungisi engcondweni yakhe. (3)

[25]

**NOBE**

**TEMZABU**

Phendvula umbuto ube MUNYE kulena yetemdzabu lemisiwe.

**UMBUTO 12: UMBUTO LOYINDZABAMBHALO****SILULU SEMASWATI – NC Mthethwa**

Bhala indzabambhalo lapho ucoca khona ngetigameko letiveta sobala incikitsi yemibhalo yetemdzabu, ubhekise kulenganekwane naletibongo letilandzelako:

- 'Indlulamitsi nengwenya'
- 'Madiba'

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 13: IMIBUTO LEMIFISHA****SILULU SEMASWATI – NC Mthethwa**

Fundza lethekesthi bese uphendvula imibuto lelandzelako.

**ITHEKSTHI D****KUFIKA KWEKUFA**

Lokwa endvulo ematje asemanti, Mlentengamunye waphosa liso lakhe lelikhulu emhlabeni, wakhanga bantfu bakhe bafa baphela, bacedvwa kufa. Wabita lunwabu, walutfuma kutsi alugijime luye emhlabeni, lufike lutjele bantfu kutsi bangasafi, baphile kudzine kube ngunaphakadze. Waludvonsa ngendlebe kutsi lungase lulinge lulibatiseke endleleni, alunonophe impela lungemi nekuma loku. 5

Phela lunwabu belutendlula tonkhe tilwane ngematubane. Nembala luvume lunwabu, lusuke lutsatsele ngematubane selubhekise emabombo emhlabeni. Ngulo lolwa selucondze kaMhlaba.

Endleleni lukhangwe tihlahla tebukhwebeletane titsele tikhehlete titselo tidzine setilengela phasi. Pho luyatifela ngebukhwebeletane. Khimilili, lunwabu. Lucalacalate bese lutsi; 'Awutsi ngitsi kukha kabili, katsatfu nginambitse letitselo ngive kutsi tiyanambitseka yini,' lusho njalo luyaphambuka endleleni lucondza etihlahleni tebukhwebeletane. Lufike luhulule titselo luphose emlonyeni, luloshele, luloshele, lushaye sentfwala. 10

Atsi uyabuka Mvelinchanti emhlabeni, abone bantfu bakhe baloku bafa futsi bangasafeli kwalapha. Kumale kutsi angaloku alindzele lunwabu ekuhambiseni umbiko wakhe ebantfwini. Loku naku nembiko awukefiki, bantfu bayaphela ngekufa. Asale atidzela abite intfulo. 15

'Ntfulo gijima uye emhlabeni, ufike utjele bantfu kutsi ngeke bafe batawuphila kube phakadze,' kusho Mvelinchanti atjela intfulo umlayeto lomusha loya ebantfwini. Ivume intfulo, isho isuka ngematubane seyintininita ilibangise emhlabeni. 20

Lunwabu aluyingeni, luchwakele esihlahleni ludla bukhwebeletane. Luloku lutsi; 'Awutsi ngidlayidle bo, ngitawubuye ngihambe.' Lutsite lusalibele bukhwebeletane lwabona shwi sitfunti, kantsi yintfulo yendlula ngendlela, isho ngematubane lamakhulu ibhekise emabombo emhlabeni. Lwetfuke lutsi, bhi luvalo, selukhumbula kutsi lulibele lapha nje lutfunyiwe. 25

Lwesuka nalo lwasho lutsatsela ngematubane emva kwentulo. Hhawa nebakitsi, lusagijima nani nje ngobe lwesutsi lushaye lesibovu, alusakhoni nekuphakamisa tinyawo. Ifike kucala intfulo yendlulise umbiko njengobe itfunyiwe. Bawemukele ngekujabula lokukhulu umbiko kantsi babonga inkhulumo lehlaneketelwe. 30

Lokwa, chamu lunwabu nalo lutewendlulisa umbiko ebantfwni. Hha! Bantfu badzineke, bangalulaleli nekutsi lutsini. Lutsi luyakhuluma, bantfu batsi, 'Sibambe lentfulo,' basho balucosha balujikijela ngematje, nalo lwavele lwatsi, galo yephuka.

[Likhasi: 49–50]

- 13.1 Caphuna umusho lokulenganekwane lowenta kutsi ibe yinganeko. Kungani ukhetse lomusho? (2)
- 13.2 Bhala tgameko LETIMBILI letikuletheksi letikhombisa kutsi lenganekwane iyimphendvulo etintfweni letingatiwa kutsi tasukelaphi. (2)
- 13.3 Nguyiphi lenkhulumo yentfulo lebeyihlaneketelwe futsi ihlaneketelwa nje, bekufanele itsini? (2)
- 13.4 Yini leyenta kutsiwe labantfu labebaphila ngalesikhatsi salenganekwane abakholweki nabacatsaniswa nalaba basetikhatsini talomuhla? Chaza. (2)
- 13.5 Bakhona yini bantfu labatinwabu emimangweni yakini? Chaza kutsi kungani ubabite ngetinwabu? (2)
- 13.6 Ngekubona kwakho, kube intfulo ayizange ifike kucala nemlayeto wayo, ngabe imphilo injani emhlabeni lomuhla? Chaza ngemaphuzu LAMABILI. (2)
- 13.7 Kwephuka kwemyalo kulenganekwane kunamtselela muni emphilweni lephilwa lomuhla? Chaza ubhekise kuloko tetsamelilwati talomuhla letikholelwa kuko. (3)

**NA**

Fundza letibongo bese uphendvula imibuto lelandzelako.

### TIBONGO TANGWANE III

- 1 Lulakane waDlamini!
- 2 Ngwane lonelulaka,
- 3 Ematfuntin'etintsaba.
- 4 Mbetsi wetidzandz' emasekweni,
- 5 Kwetfuk'emadvodza,
- 6 Bonina bangekho **basematsafeni**.
- 7 Ngwane ngimbon' abuk' emuva,
- 8 Was' ubuk' emadvodza;
- 9 Wachubekel' embili.
- 10 Chibi lisemhlonhlotseni,
- 11 Lelinganatfwa tinkhomo,
- 12 Linatfwa ngemadvodza.
- 13 Abuk' emangce,
- 14 Ngekuphephel' ematjeni,
- 15 Ats' emadvodza kusetjeni
- 16 LaNgwane.
- 17 Eva lusu lwenyama,
- 18 Yetinkhomo netinyamatane.
- 19 Wakhumbula,
- 20 Ulilitela ngagogo wakhe
- 21 WaseNkayaneni,
- 22 Wadzandzalukane.
- 23 Wagucelwa ngemadvodza
- 24 **Ngelitiko lelingenahlumela lendvodza.**
- 25 Bayethe!
- 26 Ungangetintsaba!
- 27 Mlangeni!

[Likhasi 118]

- 13.8 Bhala umugca lokuletibongo locuketse sifanankhamisa. (1)
- 13.9 Caphuna umugca lokuletibongo lokhomba kutsi Ngwane III, abebatsandza bantfu labadvuna kunalabasikati. (1)
- 13.10 Yindzawo lenjani lena leshiwo nguleligama lelicindzetelwe emgce ni we-6? (1)
- 13.11 Bunkondlo buni lobuvetwa ngumugca we-15 newe-16? Usho ngani? (1)
- 13.12 Ucabanga kutsi yini Ngwane III abitwe ngekutsi nguChibi lelisemhlonhlotseni, lelinganatfwa tinkhomo, linatfwa ngemadvodza? Chaza. (2)
- 13.13 Humusha lomugca logcanyisiwe kuletibongo letingenhla ubhekise kuNgwane III. (2)
- 13.14 Saga lesitsi, 'Alufakwa,' sihambisana ngayiphi indlela naNgwane III? Chaza ubhekise kulokushiwo kuletibongo. (2)

[25]

**SAMBA SESIGABA B: 25**

**SIGABA C: UMDLALO**

Kulesigaba kunemidlalo LEMINE. Wena-ke khetsa ube MUNYE lowufundze eklasini lonyaka uphendvule ngawo.

**CAPHELA:** Khetsa emkhatsini wenzabambhalo nemibuto lemifisha kulowo mdlalo lowufundzile. Nangabe ukhetse kuphendvula umbuto wenzabambhalo kunoveli, uphokelelekile kutsi kulesigaba uphendvule imibuto lemifisha. Nangabe ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wenzabambhalo.

**UMBUTO 14: UMBUTO LOYINDZABAMBHALO****KUTAWUBA NJALO – SZ Simelane**

Umbhali nabhala umdlalo usuke afuna kufundzisa tetsamelilwati takhe ngetintfo letitsite ngemphilo. Bhala indzabambhalo lapho uveta khona tifundvo letifundvwe kulabadlali labalandzelako: Ncobile, Mphotfo naHleta.

Indzabambhalo yakho ayibe ngemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 15: IMIBUTO LEMIFISHA****KUTAWUBA NJALO – SZ Simelane**

Fundza letheksthi bese uphendvula imibuto lelandzelako.

**ITHEKSTHI E**

*(Kusehho visi la Ncobile, uvakashelwe ngu Dzeliwe na Ntfombencane, bacoca takudzala, kusha neluhleko banatsa bonamunedi.)*

- NCANE: *(Amoyitela)* Wadla Ncobile, ekugcineni wancoba dzadze! Kunjalo phela kubeketela Ncobz.
- DZELIWE: Impela mngami Ncobile make LaHleta utawumkhohlwa ufile, uva njani nje wena sewafundza waba lijaji? Nje natsi ungasigweba sigwebo sentsambo, nobe dzilikajele? *(Bahleke kakhulu)* 5
- NCOBILE: *(Amoyitela)* Sigwebo sentsambo angeke nginigwebe sona ngobe asikho lapha kulelive kepha nangabe sikhona, nginganiphosa ngaso, dzilika yena nginganitsela ngaye emehlweni, ngibuye nginifunele ummeli kwekutsi anikhokhe ejele. *(Bahleke kakhulu futsi, bese uyababuka)* 10
- Hawu nabonga mine ngedvwa ingani nawe Dzeliwe ungumhloli? Nawe Ncane ungumphatsisikolo? Kufundza ubeketele kulukhuni kulitje, kuhle ngako loku nasekusikhatsi sekuvuna.
- DZELIWE: Kwakho kuhle kakhulu dzadze. Uyati yini kutsi naMphotfo sengudokotela? Imphilo yenu itawuba mnandzi sesi. *(Ambuke)* 15
- NCOBILE: *(Amnyonkholota)* Uyabona Dzeliwe, nangabe ufuna kwekutsi singalwi ungangitjeli ngalelo huzu mine. Mphotfo wani? Uyangati mine? Musa kudlala ngami wena Dzeli, uyeva? *(Kushube umoya)*

NCANE:	<i>(Ambhambatsa)</i> Kantsi Dzeliwe ucondze loko yini? Kantsi vele nje yena Mphotfo nawe senitakuba imphumalanga nenshonalalnga yini?	20
NCOBILE:	Niyati bomngami, naniphatsa ligama laMphotfo kutsi angigonyuluke khona nyalo. <i>(Ababuke)</i> Nine niyati kahle kamhlophe indlela lowo muntfu langihlukumeta ngayo. Ha! Mphotfo!	
DZELIWE:	<i>(Akhulumela phasi)</i> Hhayi mani Ncobile, tsine asikuhleki, sisho kutsi nje sengudokotela, hhayi kutsi sicondze kukuvusela emanceba akudzala.	25
NCANE:	<i>(Amoyimoyitela)</i> Heyi Ncobile ase usho phela kwekutsi nasewungasafuni nekuva ligama nje lelitsi Mphotfo, manje <b>lomntfwana utawutsi uyise wakhe ngubani?</b>	
NCOBILE:	<i>(Ahlekelela)</i> Ase ningiyekele nine bo, kute yini letinye tindzaba tetfu takudzala lesingaticoca? <i>(Bahleke)</i> Ase ningitjele kwekutsi unganani yena lomntfwana lenitsi angimnunusele ngaye? Niyaganga nine. Wami umntfwana wakaMagagula, uyise nguLaHleta. <i>(Kuhlekwe)</i> Nanginibuka mantfombatane, ningikhumbuta sisakhula, sifundza. Nichuba njani nine emsebentini?	30 35
DZELIWE:	<i>(Amoyitela)</i> Sisebenta kahle tsine, kodwa mine lo <i>(Atishaya sifuba)</i> ngeke ngikukhohlwe. Nguwe phela lowaba ngumkhokheli wetfu ngekutsi asihlome sifundze!	
NCANE:	Ungakukhohlwa loko Ncobile. Tsine phela seva buhlungu ngaleso sikhatsi tintfo setibhedza naMphotfo asakucoshile kantsi futsi sewukhulelwe. Sabuva buhlungu ntfombi. Uyeva? <i>(Ambuke)</i>	40
NCOBILE:	<i>(Atenwaya)</i> Kunjalo Ncane. Kantsi mine kuze ngiphumelele akusini yini? Niyakhumbula sengibuyile ngineluswane? Hhe! Kushisa ekhaya, make asaphendvuke silwane, nangibuka ngala nangala ngibone nine boresi. Ningaliphatsi ligama laMphotfo ngobe lingenta ngigule. Hheyi, ungametsembi umuntfu, lokungenani yetsemba litje.	45
DZELIWE:	<i>(Ababuke)</i> Yekela kubalisa Ncobile. Asibongeni letipho tetfu lesesinato. Asenteni umcimbi munye wekubonga batali kanye nemmango walapha Kamatsamo. <i>(Bavumelane bonkhe)</i>	
NCANE:	<i>(Asukuma)</i> Asiwenteni mantfombatana. Kutawufuneka simeme nabothishela betfu. Singatsini nje sibone sekuhleli naMphotfo kulabo lesibamemile. <i>(Bahleke)</i> Ncesi Ncobz.	50
NCOBILE:	<i>(Asancibilikile)</i> Kantsi nine niva njani bo! Angitsi Mphotfo lowo ngumngani wenu, ningayekelelani kumjabulela nibuye nimmeme futsi?	
DZELIWE:	<i>(Ahleka)</i> Ngumngani wetfu nobe ngusibali wetfu? <i>(Bahleke bonkhe bese bayavalelisa boDzeliwe naNcane, bahambe.)</i>	55

[Likhasi173–175]

- 15.1 Dzeliwe ukhuluma ngekuhloma bafundze. Bhala buhle LOBUBILI baloku lokushiwo nguDzekiwe lobukhona etikhatsini talomuhla. (2)
- 15.2 Nika ingcikitsi yalomdlalo bese wesekela ngesigameko lesihambisana nalengcikitsi. (2)
- 15.3 Yini lekhonjiswa ngulamantfombatane kuletheksthi lengenhla? Chaza. (2)
- 15.4 Ntfutfukoni leletfwa ngulamantfombatane nawubhekisa esikhalweni sebantfu labasikati ngetemisebenti? Nika emaphuzu LAMABILI. (2)

- 15.5 Nika sibonelo SINYE lesenteka lomuhla etimphilweni telusha longasifanisa nesaNcobile naMphotfo. (2)
- 15.6 Tetsamelilwati titfola siphi sifundvo ngaloko lokuhlongotwa ngulamantfombatane kuletheksthi? Bhala KUBILI. (2)
- 15.7 Tintfombi letitfolela bantfwana emakhaya tingakashadi, tiyisombulula njani lenkinga lekulomusho locindzetelwe, kuletheksthi lengenhla? Nika EMAPHUZU LAMABILI. (2)
- 15.8 Kubeketela kunemiphumela lemihle. Fakazela lombono ngekubhekisa kuNcobile. (2)
- 15.9 Ngabe Mphotfo abefanele yini kumhlukumeta Ncobile njengobe ashokuletheksthi lengenhla? Usho ngani? (2)
- 15.10 Kuboshwa kwaHleta emdlalweni kutsintsana njani nemsebenti lofundzelwe nguNcobile? Chaza. (2)
- 15.11 Ngabe Ncobile umbite kahle yini Mphotfo natsi ulihuzu? Sekela imphendvulo yakho ubhekise etentweni taMphotfo latentan gesisu saNcobile. (2)
- 15.12 Phawula ngetintfo LETINTSATFU letenta kutsi Mphotfo agcine ashade naNcobile. (3)

**[25]**



**UMBUTO 16: UMBUTO LOYINDZABAMBHALO****LAMI LISIPHETFO – JJ Thwala**

Umbhali nabhala umdlalo usuke afuna kufundzisa tetsamelilwati takhe ngetintfo letitsite ngemphilo. Bhala indzabambhalo lapho uveta khona tifundvo letifundvwe kulabadlali labalandzelako: Somhlolo, Mahubhulu, Nsibandze.

Indzabambhalo ayibe nemagama langabi ngaphasi kwala-340 kodvwa angabi ngetulu kwala-390.

**[25]****UMBUTO 17: IMIBUTO LEMIFISHA****LAMI LISIPHETFO – JJ Thwala**

Fundza lethekesthi bese uphendvula imibuto lelandzelako.

**ITHEKSTHI F**

<i>(Somhlolo naNsibandze bacoca netikhulu esigodlweni.)</i>	
SOMHLOLO:	Nginyanemukela nonkhe tikhulu letakhe kuleli laNdvungunya. Ngemukela Mashobeni lochamuka eMashobeni kaHhohho. Ngemukela Nkhasa lochamuka eLubonjeni. Ngemukela Bhocwane lochamuka eLusushwana. Ngemukela Mabhoko lochamuka eMachibini. Kini nonkhe ngitsi, kulaNdvungunya simunye! 5
TIKHULU:	Bayethe!
NYOSI:	Somhlolo unemihlolo! Mhlanganisi wetive; Ubutse Bhocwane, 10 Wamkhomb' eLusushwana; Ubutse Nkhasa, Wamkhomb' eLubonjeni; Ubutse Mashobeni, 15 Wamkhomb' eMashobeni; Ubutse Mabhoko, Wamkhomb' eMachibini! Ucondze kaMabhula! Wemba wembulula! 20 Yibindza Nkhosi!
TIKHULU:	Bayethe!
SOMHLOLO:	Kuleli laNdvungunya niyati kutsi libuswa ngekuthula. Sijula siphatselwa silwane, hhayi umuntfu. Emabutfo aviva agcwale tintsaba, hhayi kuhlasela tive lesakhelene nato. Makhelwane sihlobo sakho! Konkhe lokonakele, kulungiswa ngemlomo. Indvodza yindvodza ngemuti nebantfwana. Umfati ngumfati ngemuti nebantfwana. Ngitfolile ngetindvuna tami kutsi Mahubhulu use wanihambela nonkhe kutsi nicembuke nakhe umbuso lomusha. Ase niphendvule sive. 25
NKHASA:	Wefika Mahubhulu wangetsembisa kutsi ngitawuba ngundvunankhulu embusweni lomusha lotawucala nakutfwasa lihlobo. 30

SOMHLOLO:	Watsi nasewetsenjiswe sikhundla lesikhulu kangaka wentani?	
NKHASA:	Ngabita ndvunankhulu Nsibandze kutsi atewulalela lokushiwo nguMahubhulu. Waphatseka kabi nakeva kutsi ngibite lenye yetindvuna, ngobe ngingayemukeli lentfo layikhulumako.	35
SOMHLOLO:	Watsatsa sinyatselo lesihle kakhulu ngekwedlulisa loludzaba loluyingoti kangaka. Ngitawucela letinye tikhulu tishaye lihlombe. ( <i>Kwashaywa tandla.</i> ) Ase sive lesinye sikhulu kutsi wafika kuso watsini?	
BHOCWANE:	Wefika kimi sekuhlwile. Ngambuta kutsi yini lena lesitawuyikhuluma ngemnyama. Wanginakashela ngagcina ngimnikile litfuba lekukhuluma. Watsi angimsite ngemabutfo ufuna kuhlasela kaLobamba wesibili. Utawutsi angancoba anginike indzawo yakaLobamba wesibili ibe ngaphasi kwami.	40
SOMHLOLO:	Watsi asakukhulumile loko, wenta miphi imitamo?	45
BHOCWANE:	Ngamtjela kutsi angeke ngivukele iNkhosi yami. Wahamba aphantseke kabi. Indzaba ngayitsatsa ngayedlulisela endvuneni Sikhunyana.	
SOMHLOLO:	Budvodza ngibo lobo! Abecabanga kutsi nitawuvuma konkhe. Manini sibindzi tikhulu. Bukhulu benu buyawukuma njalo lapha kulaNdvungunya. ( <i>Kwashaywa tandla.</i> ) Ase sive Mashobeni.	50
MASHOBENI:	Wangetsembisa kuba indvuna yakhe lenkhulu. Watsi ngitawungamela konkhe lokukhona lapha kulaNdvungunya.	
SOMHLOLO:	Hawu, abetawuba netindvuna letinkhulu letimbili? Hhayi-ke ngulomunye lombuso lo bewulindzelwe eNtfwasahlobo. Wente miphi imitamo?	55
MASHOBENI:	Ngiye ngabikela Ndvunankhulu Nsibandze ngako konkhe lakukhulumile Mahubhulu. Ngiye ngatinika litfuba lelidze naye ngambonisa ngengoti langahle abukane nayo, kodvwa wayicinisa inhloko. Hheyi, icinile inhloko yalomuntfu! Litje sibili. Kwale ngisho nome sesihlala phasi naye sibonisana, kodvwa uye wangehlula.	60
SOMHLOLO:	Sibonga sibindzi lewube naso sekuba wetame kumbonisa. Sibonga nekwendlulisa loku abekusho ngobe kuyingoti esiveni sonkhe. Kukhotsama kwami kusho kubuna kwetimbali, kucisha kwetinkhanyeti, kuphela kwekuthula. Mswati usemncane kakhulu kutsi angabona konkhe loku lokwentekako. ( <i>Kwashaywa tandla.</i> )	65

[Likhasi 70–72]

- 17.1 Bhala KUBILI lokubufakazi bekutsi setfulo saletheksthi setfuleke ngalokufanele. (2)
- 17.2 Kulesakhiwana setheksthi lengenhla, ngabe Somhlolo wetfulwe ngaliphi lisu? Sekela imphendvulo yakho. (2)
- 17.3 Yini lebeyibangela Mahubhulu avakashela tikhulu? Bhala KUBILI. (2)
- 17.4 Phutsa lini lelentiwa nguSomhlolo nabita tindvuna takhe atewukhuluma ngesento saMahubhulu? Sekela imphendvulo yakho. (2)
- 17.5 Yini lebeyenta Somhlolo ahlale atsatsa teluleko taNsibandze? Nika KUBILI. (2)

- 17.6 Sifundvo sini lesisitfolo kulomdlalo? Sekela imphendvulo yakho ubhekise emdlalweni. (2)
- 17.7 Beyiyini injongo yaMahubhulu ngekwedzelela inkhosi? Bhala emaphuzu LAMABILI. (2)
- 17.8 Bhala kubumbana kwaletheksthi lengenhla nesiphetfo. (2)
- 17.9 Bungoti buni lobebungavelela tikhulu netindvuna taSomhlolo ngekuletsa imibiko enkhosini nangabe betiphila etikhatsini talomuhla? Nika KUBILI. (2)
- 17.10 Lesento saMahubhulu sekutibulala siyenteka ebantfwini basemimangweni yalomuhla. Bhala tizatfu LETIMBILI letibanga kutsi umuntfu ente lesento lesifana nesaMahubhulu. (2)
- 17.11 Somhlolo abenta kahle yini ngekungafuni kulalela imibono yaMahubhulu? Sekela imphendvulo yakho. (2)
- 17.12 Phawula ngetento LETINTSATFU lebetentiwa nguSomhlolo kube lamanye emakhosi akatenti. (3)
- [25]**

**SAMBA SESIGABA C: 25**  
**SAMBA SAKO KONKHE: 80**